

欽定舊五代史

卷三十四之四十六

欽定舊五代史

卷三十四 三十四

舊五代史卷三十四

宋門下侍郎參知政事監修國史薛居正等撰

唐書第十

莊宗紀八

同光四年春正月戊午朔帝不受朝賀契丹寇渤海壬戌詔以去歲因被災沴物價騰踊自今月三日後避正殿減膳撤樂以答天譴應去年遭水災州縣秋夏稅賦並與放免自壬午年已前所欠殘稅及諸色課利已有勅命放免者尙聞所在却有徵收宜令租庸司切準前勅處分應京畿內人戶有停貯斛斛者並令減價出糶如不遵行當令檢括西川王衍父子及僞署將相官吏除已行刑憲外一切釋放天下禁囚除十惡五逆官典犯贓屠牛毀錢放火劫舍持刀殺人者準律常赦不原外應合抵極刑者遞降一等其餘罪犯悉與減降逃背軍健並放逐便癸亥河中節度使李繼麟來朝諸州上言準宣爲去年十月地震集僧道起消災道場甲子魏王繼岌殺樞密使郭崇韜于西川且夷其族丙寅百官上表請復帝膳凡三上表乃允之西川行營都監李廷安進西川樂官二百九十八人契丹寇女真渤海戊寅契丹安巴堅遣使貢良馬庚辰帝異母弟鄜州節度使存乂伏誅存乂郭崇韜之子壻也故亦及于禍是日以河中節

度使守太師兼尙書令西平王李繼麟爲滑州節度使尋令朱守殷以兵圍其第誅之亦夷其族辛巳吐
渾奚各遣使貢馬鎮州上言部民凍死者七千二百六十人又奏準宣進花果樹栽及抽樂人梅審譯赴
京甲申以鄆州節度使承王存霸爲河中節度使以滑州節度使申王存渥爲鄆州節度使乙酉內人景
姪上言昭宗遇難之時皇屬千餘人同時遇害爲三穴瘞于宮城西古龍興寺北請改葬從之仍詔河南
府監護其事丙戌回鶻可汗阿都欲遣使貢良馬鎮州上言平棘等四縣部民餓死者二千五十人丁亥
詔朱友謙同惡人史武等七人已當國法並籍沒家產武等友謙舊將時皆爲刺史並以無罪族誅

歐陽史丁

亥殺李繼麟之將史武薛敬容周唐殷楊師太王景來仁白奉國滅其族

二月己丑以宣徽南院使知內侍省兼內勾特進右領軍衛上將軍

李紹宏爲驃騎大將軍守左武衛上將軍知內侍省充樞密使甲午以鄆州刺史李紹奇爲河陽節度使
以樂人景進爲銀青光祿大夫檢校右散騎常侍守御史大夫進以俳優嬖幸嘗采訪閭巷鄙細事以啟
奏復密求妓媵以進恩寵特厚魏州錢穀諸務及招兵市馬悉委進監臨孔謙附之以希寵常呼爲八哥
諸軍左右無不托附至于士人亦有因之而求仕進者每入言事左右紛然屏退惟以陷害熒惑爲意焉
是日帝幸冷泉校獵乙未宰臣豆盧革上言請支州縣官實俸以責課效丙申武德使史產瓊自鄴馳報
稱今月六日貝州屯駐兵士突入都城剽劫坊市初帝令魏博指揮使楊仁晟率兵戍瓦橋至是代歸有

詔令于貝州上歲天下大水十月鄴地大震自是居人或有亡去他郡者每日族談巷語云城將亂矣人人恐悚皆不幽安十二月以戶部尙書王正言爲興唐尹知留守事正言年耄風病事多忽忘比無經治之才武德使史彥瓊者以伶官得幸帝待以腹心之任都府之中威福自我正言已下皆脅肩低首曲事不暇由是政無統攝姦人得以窺圖洎郭崇韜伏誅人未測其禍始皆云崇韜已殺繼岌自王西川故盡誅郭氏先是有密詔令史彥瓊殺朱友謙之子澶州刺史建徽史彥瓊夜半出城不言所往詰旦聞報正言曰史武德夜半馳馬而去不知何往是日人情震駭訛言云劉皇后以繼岌死于蜀已行弑逆帝已晏駕故急徵彥瓊其言播于鄴市貝州軍士有私親寧于都下者掠此言傳于貝州軍士皇甫暉等因夜聚誦博不勝遂作亂劫都將楊仁晟曰我輩十有餘年爲國家効命甲不離體已至吞併天下主上未垂恩澤翻有猜嫌防戍邊遠經年離阻鄉國及得代歸去家咫尺不令與家屬相見今聞皇后弑逆京邑已亂將士各欲歸府寧親請公同行仁晟曰汝等何謀之過耶今英主在上天下一家從駕精兵不下百萬西平巴蜀威振華夷公等各有家族何事如此軍人乃抽戈露刃環仁晟曰三軍怨怒咸欲謀反苟不聽從須至無禮仁晟曰吾非不知此但丈夫舉事當計萬全軍人卽斬仁晟裨將趙在禮聞軍亂衣不及帶將踰垣而遁亂兵追及白刃環之曰公能爲帥否否則頭隨刃落在禮懼卽曰吾能爲之衆遂呼譟中夜

燔劫貝郡詰旦擁在禮趨臨清剽永濟館陶五日晚有自貝川來者言亂兵將犯都城都巡檢使孫鐸等急趨史彥瓊之第告曰賊將至矣請給鎧仗登陴拒守彥瓊曰今日賊至臨清計程六日方至爲備未晚孫鐸曰賊來寇我必倍道兼行一朝失機悔將何及請僕射率衆登陴鐸以勁兵千人伏于王莽河逆擊之賊旣挫勢須至離潰然後可以翦除如俟其凶徒薄于城下必慮奸人內應則事未可測也彥瓊曰但訓士守城何須卽戰時彥瓊疑孫鐸等有他志故拒之是夜三更賊果攻北門彥瓊時以部衆在北門樓聞賊呼譟卽時驚潰彥瓊單騎奔京師遲明亂軍入城孫鐸與之巷戰不勝攜其母自水門而出獲免晡晚趙在禮引諸軍據宮城署皇甫暉趙進等爲都虞候斬斫使諸軍大掠興唐尹王正言謁在禮望塵再拜是日衆推在禮爲兵馬留後草奏以聞帝怒命宋州節度使元行欽率騎三千赴鄴都招撫詔徵諸道之師進討丁酉淮南楊溥遣使賀平蜀己亥魏王繼岌奏康延孝擁衆反廻寇西川遣副招討使任圜率兵追討之庚子福建節度副使王延翰奏節度使王審知委權知軍府事邢州左右步直軍四百人據城叛推軍校趙太爲留後詔東北面副招討使李紹真率兵討之辛丑元行欽至鄴都進攻南門以詔書招諭城中趙在禮獻羊酒勞軍登城遙拜行欽曰將士經年離隔父母不取勅旨歸寧上貽聖憂追悔何及儻公善爲敷奏俾從渙汗某等亦不敢不改過自新行欽曰上以汝輩有社稷功必行赦宥因以詔書諭

之皇甫暉聚衆大誅卽壞詔行欽以聞帝怒曰攻城之日勿遺囑類壬寅行欽自鄴退軍保澶州甲辰從馬直宿衛軍士王溫等五人夜半謀亂殺本軍使爲衛兵所擒磔于本軍之門丙午以右散騎常侍韓彥憚爲戶部侍郎丁未鄴都行營招撫使元有欽率諸道之師再攻鄴都戊申以洋州留後李紹文爲夔州節度使詔河中節度使永王存霸歸藩己酉以樞密使宋唐玉爲特進左威衛上將軍充宣徽南院使庚戌諸軍大集于鄴都進攻其城不克行欽又大治攻具城中知其無赦晝夜爲備朝廷聞之益恐連發中使促繼岌西征之師繼岌以康延孝據漢州中軍之士從任圜進討繼岌端厝利州不獲東歸是日飛龍使顏思威部署西川宮人至辛亥淮南楊溥遣使貢方物西京上言客省使李嚴押蜀主王衍至本府壬子以守太尉中書令河南尹兼河陽節度使齊王張全義爲檢校太師兼尙書令充許州節度使東川董璋奏準詔誅遂州節度使李令德于本州夷其族癸丑湖南馬殷奏福建節度使王審知疾甚副使王延翰已權知軍府事請降旄節司天監上言自二月上旬後晝夜陰雲不見天象自二十六日方晴至月終星辰無變以右衛上將軍朱漢賓知河南府事甲辰命蕃漢總管李嗣源統親軍赴鄴都以討趙在禮帝素倚愛元行欽鄴城軍亂卽命爲行營招討使久而無功時趙太據邢州王景戡據滄州自爲留後河朔郡邑多殺長吏帝欲親征樞密使與宰臣奏言京師者天下根本雖四方有變陛下宜居中以制之但命

將出征無煩躬御士伍帝曰紹榮討亂未有成功繼岌之軍尙留巴漢餘無可將者斷在自行樞密使李紹宏等奏曰陛下以謀臣猛將取天下今一州之亂而云無可將者何也總管李嗣源是陛下宗臣創業已來艱難百戰何城不下何賊不平威略之名振于夷夏以臣等籌之若委以專征鄴城之寇不足平也帝素寬大容納無疑于物自誅郭崇韜朱友謙之後闊宦伶官交相譏諂邦國大事皆聽其謀繇是漸多猜貳不欲大臣典兵既聞奏議乃曰予恃嗣源侍衛卿當擇其次者又奏曰以臣等料之非嗣源不可河南尹張全義亦奏云河朔多事久則患生宜令總管進兵如倚李紹榮輩未見其功帝乃命嗣源行營是日延州知州白彥琛奏綏銀兵士剽州城謀叛魏王繼岌傳送郭崇韜父子首函至闕下詔張全義收瘞之已以右武衛上將軍李肅爲安邑解縣兩池榷鹽使以吏部尙書李琪爲國計使三月丁未朔李紹真奏收復邢州擒賊首趙太等二十一人徇于鄴都城下皆磔于軍門庚戌李紹真自邢州赴鄴都城下辛亥以威武軍節度副使福建管内都指揮使檢校太傅守江州刺史王延翰爲福建節度使依前檢校太傅壬子李嗣源領軍至鄴都營于西南隅甲寅進營于觀音門外下令諸軍詰旦攻城是夜城下軍亂迫嗣源爲帝遲明亂軍擁嗣源及霍彥威入于鄴城復爲皇甫暉趙進等所脅嗣源以詭詞得出夜分至魏縣時嗣源遙領鎮州詰旦議欲歸藩上章請罪安重誨以爲不可語在明宗紀中翼日遂次于相州元

行欽部下兵退保衛州以飛語上奏嗣源一日之中遣使上章申理者數四帝遣嗣源子從審與中使白從訓實詔以諭嗣源行至衛州從審爲元行欽所械不得達是日西面行營副招討使任圜奏收復漢州擒逆賊康延孝丙辰荆南高季興上言請割峽內夔忠萬等三州却歸當道依舊管係又請雲安監初將議伐蜀詔高季興令率本軍上峽自收元管屬郡軍未進夔忠萬三州已降季興數請之因賂劉皇后及宰臣樞密使內外叶附乃俞其請戊午詔河南府預借今年夏秋租稅時年饑民困百姓不勝其酷京畿之民多號泣于路議者以爲劉盆子復生矣庚申詔潞州節度使孔勅赴闕以右龍虎統軍安崇阮權知潞州是日忠武軍節度使齊王張全義薨壬戌宰臣豆盧革率百官上表以魏博軍變請出內府金帛優給將士不報時知星者上言客星犯天庫宜散府藏又云流星犯天棓主御前有急兵帝召宰臣于便殿皇后出宮中妝奩銀盆各二并皇子滿哥三人謂宰臣曰外人謂內府金寶無數向者諸侯貢獻旋供賜與今宮中有者妝奩嬰孺而已可鬻之給軍革等惶恐而退癸亥以僞置昭武軍節度使林思謬爲閬州刺史是日出錢帛給賜諸軍兩樞密使及宋唐玉景進等各貢助軍錢幣是時軍士之家乏食婦女掇蔬于野及優給軍人皆負物而詬曰吾妻子已殍矣用此奚爲甲子元行欽自衛州率部下兵士歸帝幸耀店以勞之西川輦運金銀四十萬至闕分給將士有差元行欽請車駕幸汴州帝將發京師遣中官詢延

嗣馳詔所在誅蜀主王衍仍夷其族乙丑車駕發京師戊辰遣元行欽將騎軍沿河東向壬申帝至滎澤以龍驤馬軍八百騎爲前軍遣姚彥溫董之彥溫行至中牟率所部奔于汴州時潘瓌守王村寨有積粟數萬亦奔汴州是時李嗣源已入于汴帝聞諸軍離散精神沮喪至萬勝鎮卽命旋師登路旁荒塚置酒視諸將流涕俄有野人進雉因問塚名對曰里人相傳爲愁臺帝彌不悅罷酒而去是夜次汜水初帝東出關從駕兵二萬五千及復至汜水已失萬餘騎乃留秦州都指揮使張瑋以步騎三千守關帝過嬰子谷道路險狹每遇衛士執兵仗者皆善言撫之曰適報魏王繼岌又進納西川金銀五十萬到京當盡給爾等軍士對曰陛下賜與大晚人亦不感聖恩帝流涕而已又索昶帶賜從官內庫使張容哥對曰頒給已盡衛士叱容哥曰致吾君社稷不保是此閭豎抽刀逐之或救而獲免容哥謂同黨曰皇后惜物不散軍人歸罪于吾輩事若不測吾輩萬段願不見此禍因投河而死

隆平集內臣李承進述事唐莊宗太祖嘗問莊宗時事對曰莊宗好畋獵每次近郊衛士必控馬首曰兒郎輩寒冷望陛下與救接莊宗隨所欲給之如此者非一晚年蕭牆之禍由賞賚無節威令不行也太祖歎曰二十年夾河戰爭不能以軍法約束此輩誠兒戲

甲戌次石

橋帝置酒野次悲啼不樂謂元行欽等諸將曰鄴下亂離寇盜蜂起總管迫于亂軍存亡未測今訖言紛擾朕實無聊卿等事予已來富貴急難無不共之今茲危感賴爾籌謀而竟默默無言坐觀成敗予在滎澤之日欲單騎渡河訪求總管面爲方略招撫亂軍卿等各吐智襟共陳利害今日俾予至此卿等如何

元行欽等百餘人垂泣而奏曰臣本小人蒙陛下撫養位極將相危難之時不能立功報主雖死無以塞責乞申後効以報國恩于是百餘人皆援刀截髮置鬚于地以斷首自誓上下無不悲號識者以爲不祥是日西京留守張筠部署西征兵士到京見于上東門外晡晚帝還宮初帝在汜水衛兵散走京師恐駭不寧及帝至人情稍安乙亥百官進名起居安義節度使孔勛奏點校兵士防城準詔運糧萬石進發次時勛已殺監軍使據城詭奏也丙子樞密使李紹宏與宰相豆盧革草說會于中興殿之廊下商議軍機因奏魏王西征兵士將至車駕且宜控汜水以俟魏王從之午時帝出上東門親閱騎軍誠以詰旦東幸申時還宮四月丁丑朔以永王存霸爲北都留守申王存渥爲河中節度使是日車駕將發京師從駕馬軍陳于寬仁門外步兵陳于五鳳門外帝內殿食次從馬直指揮使郭從謙自本營率所部抽戈露刃至興教門大呼與黃甲兩軍引弓射興教門帝聞其變自宮中率諸王近衛禦之逐亂兵出門旣而焚興教門緣城而入登宮牆譱譱帝御親軍格鬪殺亂兵數百俄而帝爲流矢所中亭午崩于絳霄殿之廡下時年四十二

琬琰集載宋實錄王全斌傳云同光末蕭牆有變亂兵逼宮城近臣宿將皆釋甲潛遁惟全斌與符彥卿等十數人居中拒戰莊宗中流矢扶掖歸絳霄殿全斌慟哭而去東都事略符彥卿傳云郭從謙之亂莊宗左右皆引去惟彥卿力戰殺十餘人莊宗崩彥卿慟哭而去

是時帝之左右例皆奔散唯五坊人善友斂廊下樂器簇于帝尸之上發火焚之及明宗入洛止得其燼骨而已天成元年七月丁卯有司上諡曰光聖神閔孝皇帝廟

號莊宗是月丙子葬于雍陵

五代史補莊宗之嗣位也志在渡河但恨河東地狹兵少思欲百練其衆以取必勝于天下乃下令曰凡出師騎軍不見賊不許騎馬或步騎前後已定

不得越軍分以避險惡其分路並進期會有處不得違晷刻並在路敢言病者皆斬之故三軍懼法而戮力皆一以當百故朱梁舉天下而不能禦卒爲所滅良有以也初莊宗爲公子時雅好音律又能自撰曲子詞其後凡用軍前後隊伍皆以所撰詞授之使揭聲而唱謂之御製至于入陣不論勝負馬頭纔轉則衆歌齊作故凡所鬪戰人忘其死斯亦用軍之一奇也莊宗好獵每出未有不踐苗稼一旦至中牟圍合忽有縣令忘其姓名犯圍諫曰大凡有國家者當視民如赤子性命所繫陛下以一時之娛恣其踐使比屋蕭然動溝壑之慮爲民父母豈若是耶莊宗大怒以爲遭縣令所辱遂叱退將斬之伶官鏡新磨者知其不可乃與羣伶齊進挽住令佯爲訴責曰汝爲縣可以指麾百姓爲兒既天子好獵卽合多留閒地安得縱百姓耕鋤皆徧妨天子鷹犬飛走耶而又不能自責更敢咄咄吾知汝當死罪諸伶亦皆囁笑繼和于是莊宗默然其怒少霽頃之恕縣令罪五代史闕文莊宗嘗因博戲觀骰子采有暗相輪者心悅之乃自置暗箭格凡博戲並認采之在下者及同光末鄴都兵亂從謙以兵犯興教門莊宗禦之中流矢而崩識者以爲暗箭之應

史臣曰莊宗以雄圖而起河汾以力戰而平汴洛家讐旣雪國祚中興雖少康之嗣夏配天光武之膺圖受命亦無以加也然得之孔勞失之何速豈不以驕于驟勝逸于居安忘櫛沐之艱難徇色禽之荒樂外則伶人亂政內則牝雞司晨漸恣貨財激六師之憤怨徵搜輿賦竭萬姓之脂膏大臣無罪以獲誅衆口吞聲而避禍夫有一于此未或不亡矧咸有之不亡何待靜而思之足以爲萬世之炯戒也

舊五代史卷三十四攷證

唐莊宗紀八令朱守殷以兵圍其第 案圍其第歐陽史作圍其館胡三省云歐陽史蓋謂朱友謙無私第在洛陽也據雲谷雜記唐末藩鎮入朝館舍皆稱邸第似無庸更易其字通鑑仍從是書作第

三月丁未朔 丁未通鑑作丁巳

庚戌李紹真自邢州赴鄴都城下 案通鑑作庚申李紹真引兵至鄴都營於城西北以太等徇于鄴城

下而殺之與是書異

甲寅進營于觀音門外下令諸軍詰旦攻城是夜城下軍亂 案通鑑作壬戌李嗣源至鄴都甲子夜軍亂攷異引莊宗實錄作壬戌至鄴都癸亥夜軍士張破敗作亂與是書異日通鑑從是書

帝遣嗣源子從審 從審歐陽史及通鑑俱作從璟是書本紀前後俱作從審未知何據

帝幸耀店以勞之 耀店通鑑作鵠店胡三省注云薛史作耀店今仍其舊

甲戌次石橋 甲戌通鑑作甲申

四月丁丑朔 案歐陽史及通鑑五代春秋俱作四月丁亥朔攷遼史天顯元年卽同光四年亦作四月

丁亥朔是書莊宗紀作丁丑明宗紀作丁亥前後互異攷是年正月戊午朔三月丁未朔則四月朔日

當爲丁丑

五坊人善友 案通鑑作鷹坊人善友胡三省注云鷹坊唐時五坊之一也善姓也

安巴堅舊作阿保機今改 阿都欲舊作阿咄欲今改

舊五代史卷三十五

宋門下侍郎參知政事監修國史薛居正等撰

唐書第十一

明宗紀一

明宗聖德和武欽孝皇帝諱亶初名嗣源及卽位改今諱代北人也世事武皇及其錫姓也遂編于屬籍
四代祖諱聿皇贈麟州刺史天成初追尊爲孝恭皇帝廟號惠祖陵曰遂陵高祖妣衛國夫人崔氏追諡
爲孝恭昭皇后三代祖諱教皇贈朔州刺史追尊爲孝質皇帝廟號毅祖陵曰衍陵曾祖妣趙國夫人張
氏追諡爲孝質順皇后皇祖諱琰皇贈蔚州刺史追尊爲孝靖皇帝廟號烈祖陵曰奕陵皇祖妣秦國夫
人何氏追諡爲孝靖穆皇后皇考諱霓皇贈汾州刺史追尊爲孝成皇帝廟號德祖陵曰慶陵皇妣宋國
夫人劉氏追諡爲孝成懿皇后帝卽孝成之元子也以唐咸通丁亥歲九月九日懿皇后生帝于應州之
金城縣初孝成事唐獻祖爲愛將獻祖之失振武爲吐渾所攻部下離散孝成獨奮忠義解蔚州之圍武
皇之鎮鴈門也孝成厭代帝年甫十三善騎射獻祖見而撫之曰英氣如父可侍吾左右每從圍獵仰射
飛鳥控弦必中尋隸武皇帳下武皇遇上源之難將佐罹害甚衆帝時年十七翼武皇踰垣脫難于亂兵

流矢之內獨無所傷武皇鎮河東以帝掌親騎時李存信爲蕃漢大將每總兵征討師多不利武皇遂選

帝副之所向克捷帝嘗宿于鴈門逆旅媼方娠不時具饌媼腹中兒語云大家至矣速宜進食媼異之

遽起親奉庖爨甚恭帝詰之媼告其故

北夢瑣言云帝以媼前倨後恭詰之曰公貴不可言也問其故具道娠子腹語事帝曰老媼遜言懼吾辱耳後果如其言帝既

壯雄武獨斷謙和下士每有戰功未嘗自伐居常惟治兵仗持廉處靜晏如也武皇常試之召于泉府命

恣其所取帝惟持束帛數緡而出凡所賜與分給部下嘗與諸將會諸將矜衞武勇帝徐曰公輩以口擊

賊吾以手擊賊衆慙而止景福初黑山戍將王弁據振武叛帝率其屬攻之擒弁以獻乾寧三年梁人急

攻兗鄆帥朱瑄求救于武皇武皇先遣騎將李承嗣史儼授之復遣李存信將兵三萬屯于莘縣關汴

軍益盛攻兗甚急存信遣帝率三百騎而往敗汴軍于任城遂解兗州之圍朱瑄見帝執手涕謝其年魏

帥羅宏信背盟襲破李存信于莘縣帝奮命殿軍而還武皇嘉其功卽以所屬五百騎號曰橫衝都侍于

帳下故兩河間目帝爲李橫衝明年武皇遣大將軍李嗣昭率師下馬嶺關將復邢洛梁將葛從周以兵

應援嗣昭兵敗退入青山口梁軍扼其路步兵不戰自潰嗣昭不能制會帝本軍至謂嗣昭曰步兵雖散

若吾輩空迴大事去矣爲公試決一戰不捷而死差勝被囚嗣昭曰吾爲卿副帝率其屬解鞍礪鏃憑高

列陣左右指畫梁人莫之測因呼曰吾王命我取葛司徒他士可無併命卽徑犯其陣奮擊如神嗣昭繼

進梁軍卽時退去帝與嗣昭收兵入關帝四中流矢血流被股武皇解衣授藥手賜卮酒拊其背曰吾兒神人也微吾兒幾爲從周所笑自青山之戰名聞天下天復中梁祖遣氏叔琮將兵五萬營于洞渦是時諸道之師畢萃于太原郡縣多陷于梁晉陽城外營壘相望武皇登陴號令不遑飲食屬大雨彌旬城壘多壞武皇令帝與李嗣昭分兵四出突入諸營梁軍由是引退帝率偏師追襲復諸郡邑昭宗之幸鳳翔也梁祖率衆攻圍岐下武皇奉詔應援遣李嗣昭周德威出師晉絳營于蒲縣嗣昭等軍大爲梁將朱友寧氏叔琮所敗梁之追兵直抵晉陽營于晉祠日以步騎環城武皇登城督衆憂形于色攻城旣急武皇與大將謀欲出奔雲中帝曰攻守之謀據城百倍但兒等在必能固守乃止居數日潰軍稍集率敢死之士日夜分出諸門掩襲梁軍擒其驍將游崑崙等梁軍失勢乃燒營而退天祐五年五月莊宗親將兵以救潞州之圍帝時領突騎左右軍與周德威分爲二廣帝晨至夾城東北隅命斧其鹿角負芻填塹下馬乘城大譟時德威登西北隅亦譟以應之帝先入夾城大破梁軍是日解圍其功居最柏鄉之役兩軍旣成列莊宗以梁軍甚盛慮師入之怯欲激壯之手持白金巨鍾賜帝酒謂之曰卿見南軍白馬赤馬都否觀之令人膽破帝曰彼虛有其表耳翼日當歸吾廐中莊宗拊髀大笑曰卿已氣吞之矣帝引鍾盡醢卽屬韃揮弭躍馬挺身與其部下百人直犯白馬都奮擣舞稍生挾二騎校而迴飛矢麗帝甲如蝟毛焉由